

四庫全書

史部

欽定四庫全書

明會典卷一百三十四

刑部九

比科

諸司職掌

律令

戶役

田宅

倉庫

課程

錢債

市廛

戶役

明律

脫漏戶口

凡一戶全不附籍有賦役者家長杖一百無賦役者杖八十附籍當差若將他人隱蔽在戶不報及相冒合戶附籍有賦役者亦杖一百無賦役者亦杖八十若將另居親屬隱蔽在戶不報及相冒合戶附籍者各減二等所隱之人並與同罪改正立戶別籍當差其同宗伯

叔弟姪及婿自來不曾分居者不在此限 其見在官役使辦事者雖脫戶止依漏口法 若隱漏自己成丁人口不附籍及增減年狀妄作老幼廢疾以免差役者一口至三口家長杖六十每三口加一等罪止杖一百不成丁三口至五口笞四十每五口加一等罪止杖七十八籍當差 若隱蔽他人丁口不附籍者罪亦如之所隱之人與同罪發還本戶附籍當差 若里長失於取勘致有脫戶者一戶至五戶笞五十每五戶加一等

罪止杖一百漏口者一口至十口笞三十每十口加一等罪止笞五十本縣提調正官首領官吏脫戶者十戶笞四十每十戶加一等罪止杖八十漏口者十口笞二十每三十口加一等罪止笞四十知情者並與犯人同罪受贓者計贓以枉法從重論若官吏曾經三次立案取勘已責里長文狀叮嚀省諭者事發罪坐里長

人戶以籍為定

凡軍民驛竈醫卜工樂諸色人戶並以籍為定若詐冒

脫免避重就輕者杖八十其官司妄准脫免及變亂板籍者罪同 若詐稱各衛軍人不當軍民差役者杖一百發邊遠充軍

私創庵院及私度僧道

凡寺觀庵院除見在處所外不許私自創建增置違者杖一百還俗僧道發邊遠充軍尼僧女冠入官為奴若僧道不給度牒私自簪剃者杖八十若由家長家長當罪寺觀住持及受業師私度者與同罪並還俗

立嫡子違法

凡立嫡子違法者杖八十其嫡妻年五十以上無子者得立庶長子不立長子者罪亦同 若養同宗之人為子所養父母無子而捨去者杖一百發付所養父母收管若有親生子及本生父母無子欲還者聽 其乞養異姓義子以亂宗族者杖六十若以子與異姓人為嗣者罪同其子歸宗 其遺棄小兒年三歲以下雖異姓仍聽收養即從其姓 若立嗣雖係同宗而尊卑失序

者罪亦如之其子亦歸宗改立應繼之人 若庶民之家存養奴婢者杖一百即放從良

收留迷失子女

凡收留人家迷失子女不送官司而賣為奴婢者杖一百徒三年為妻妾子孫者杖九十徒二年半若得迷失奴婢而賣者各減良人罪一等被賣之人不坐給親完聚 若收留在逃子女而賣為奴婢者杖九十徒二年半為妻妾子孫者杖八十徒二年若得在逃奴婢而賣



者各減良人罪一等其被賣在逃之人又各減一等若在逃之罪重者自從重論其自收留為奴婢妻妾子孫者罪亦如之隱藏在家者並杖八十若買者及牙保知情減犯人罪一等追價入官不知者俱不坐追價還主若冒認良人為奴婢者杖一百徒三年為妻妾子孫者杖九十徒二年半冒認他人奴婢者杖一百

賦役不均

凡有司科徵稅糧及攤泛差役各驗籍內戶口田糧定

立等第科差若放富差貧那移作弊者許被告貧民赴拘該上司自下而上陳告當該官吏各杖一百若上司不為受理者杖八十受財者計贓以枉法從重論

丁夫差遣不平

凡應差丁夫雜匠而差遣不均平者一人笞二十每五人加一等罪止杖六十 若丁夫雜匠承差而稽留不着役及在役日滿而所司不放回者一日笞一十每三日加一等罪止笞五十

隱蔽差役

凡豪民令子孫弟姪跟隨官員隱蔽差役者家長杖一百官員容隱者與同罪受財者計贓以枉法從重論跟隨之人免罪充軍 其功臣容隱者初犯免罪附過再犯住支俸給一半三犯全不支給四犯依律論罪

禁革主保里長

凡各處人民每一百戶內議設里長一名甲首一十名輪年應役催辦錢糧勾攝公事若有妄稱主保小里長

保長主首等項名色生事擾民者杖一百遷徙 其合  
設耆老須於本鄉年高有德衆所推服人內選充不許  
罷閒吏卒及有過之人充應違者杖六十當該官吏笞  
四十

逃避差役

凡民戶逃往隣境州縣躲避差役者杖一百發還原籍  
當差其親管里長提調官吏故縱及隣境人戶隱蔽在  
已者各與同罪若里長知而不逐遣及原管官司不移

文起取若移文起取而所在官司占愴不發者各杖六十其在洪武七年十月以前流移他郡曾經附籍當差者勿論限外逃者論如律 若丁夫雜匠在役及工樂雜戶逃者一日笞一十每五日加一等罪止笞五十提調官吏故縱者各與同罪受財者計贓以枉法從重論不覺逃者五人笞二十每五人加一等罪止笞四十不及五名者免罪

點差獄卒

凡各處獄卒於相應慣熟人內點差應役令人代替者  
笞四十

私役部民夫匠

凡有司官私役使部民及監工官私役使夫匠出百里  
之外及久占在家使喚者一名笞四十每五名加一等  
罪止杖八十每名計一日追給雇工錢六十文 若有  
吉凶及在家借使雜役者勿論其所使人數不得過五  
十名每名不得使過三日違者以私役論

別籍異財

凡祖父母父母在而子孫別立戶籍分異財產者杖一百  
若居父母喪而兄弟別立戶籍分異財產者杖八十

卑幼私擅用財

凡同居卑幼不由尊長私擅用本家財物者二十貫笞二十每二十貫加一等罪止杖一百  
若同居尊長應分家財不均平者罪亦如之

收養孤老

凡鰥寡孤獨及篤廢之人貧窮無親屬依倚不能自存所在官司應收養而不收養者杖六十若應給衣糧而官吏尅減者以監守自盜論

田宅

明律

欺隱田糧

凡欺隱田糧脫漏版籍者一畝至五畝笞四十每五畝



加一等罪止杖一百其田入官所隱稅糧依數徵納  
若將田土移坵換段那易等則以高作下減瞞糧額及  
詭寄田糧影射差役并受寄者罪亦如之其田改正收  
科當差里長知而不舉與犯人同罪其還鄉復業  
人民丁力少而舊田多者聽從儘力耕種報官入籍計  
田納糧當差若多餘占田而荒蕪者三畝至十畝笞三  
十每十畝加一等罪止杖八十其田入官若丁力多而  
舊田少者告官於附近荒田內驗力撥付耕種

檢踏災傷田糧

凡部內有水旱霜雹及蝗蝻為害一應災傷田糧有司  
官吏應准告而不即受理申報檢踏及本管上司不與  
委官覆踏者各杖八十若初覆檢踏官吏不行親詣田  
所及雖詣田所不為用心從實檢踏止憑里長甲首朦  
朧供報中間以熟作荒以荒作熟增減分數通同作弊  
瞞官害民者各杖一百罷職役不叙若致枉有所徵免  
糧數計贓重者坐贓論里長甲首各與同罪受財者並

計贓以枉法從重論 其檢踏官吏及里長甲首失於  
關防致有不實者計田十畝以下免罪十畝以上至二  
十畝笞二十每二十畝加一等罪止杖八十 若人戶  
將成熟田地移坵換段冒告災傷者一畝至五畝笞四  
十每五畝加一等罪止杖一百合納稅糧依數追徵入  
官

功臣田土

凡功臣之家除撥賜公田外但有田土從管莊人盡數

報官入籍納糧當差違者一畝至三畝杖六十每三畝加一等罪止杖一百徒三年罪坐管莊之人其田入官所隱稅糧依數徵納若里長及有司官吏踏勘不實及知而不舉者與同罪不知者不坐

### 盜賣田宅

凡盜賣換易及冒認若虛錢實契典賣及侵占他人田宅者田一畝屋一間以下笞五十每田五畝屋三間加一等罪止杖八十徒二年係官者各加二等若強占

官民山場湖泊茶園蘆蕩及金銀銅場鐵冶者杖一百  
流三千里 若將互爭及他人田產妄作已業朦朧投  
獻官豪勢要之人與者受者各杖一百徒三年 田產  
及盜賣過田價并遽年所得花利各還官給主 若功  
臣初犯免罪附過再犯住支俸給一半三犯全不支給  
四犯與庶人同罪

任所置買田宅

凡有司官吏不得於見任處所置買田宅違者笞五十

解任田宅入官

典買田宅

凡典買田宅不稅契者笞五十仍追田宅價錢一半入官不過割者一畝至五畝笞四十每五畝加一等罪止杖一百其田入官 若將已典賣與人田宅朦朧重復典賣者以所得價錢計贓准竊盜論免刺追價還主田宅從原典買主為業若重複典買之人及牙保知情者與犯人同罪追價入官不知者不坐 其所典田宅園

林碾磨等物年限已滿業主備價取贖若典主托故不肯放贖者笞四十限外逾年所得花利追徵給主依價取贖其年限雖滿業主無力取贖者不拘此律

盜耕種官民田

凡盜耕種他人田者一畝以下笞三十每五畝加一等罪止杖八十荒田減一等強者各加一等係官者各又加二等花利歸官主

荒蕪田地

凡里長部內已入籍納糧當役田地無故荒蕪及應課種桑麻之類而不種者俱以十分為率一分笞二十每  
一分加一等罪止杖八十縣官各減二等長官為首佐  
職為從人戶亦計荒蕪田地及不種桑麻之類以五分  
為率一分笞二十每一分加一等追徵合納稅糧還官  
棄毀器物稼穡等

凡棄毀人器物及毀伐樹木稼穡者計賊准竊盜論免  
刺官物加二等若遺失及誤毀官物者各減三等並驗



數追償私物者償而不坐罪 若毀人墳塋內碑碣石  
獸者杖八十毀人神主者杖九十若毀損人房屋垣牆  
之類者計合用修造雇工錢坐贓論各令修立官屋加  
二等誤毀者但令修立不坐罪

擅食田園瓜果

凡於他人田園擅食瓜果之類坐贓論棄毀者罪亦如  
之其擅將去及食係官田園瓜果若官造酒食者加二  
等主守之人給與及知而不舉者與同罪若主守私自

將去者並以監守自盜論

私借官車船

凡監臨主守將係官車船店舍碾磨之類私自借用或轉借與人及借之者各笞五十驗日追雇賃錢入官若討雇賃錢重者各坐贓論加一等

明會典卷一百三十四

欽定四庫全書

明會典卷一百三十五

刑部十

倉庫

明律

鈔法

凡印造寶鈔與洪武大中通寶及歷代銅錢相兼行使其民間買賣諸物及茶鹽商稅諸色課程並聽收受違

者杖一百 若諸人將寶鈔赴倉場庫務折納諸色課程中買鹽貨及各衙門起解贓罰須要於鈔背用使姓名私記以憑稽考若有不行用心辨驗收受偽鈔及挑剗描輳鈔貫在內者經手之人杖一百倍追所納鈔貫偽挑鈔貫燒毀其民間關市交易亦許用使私記若有不行仔細辨驗誤相行使者杖一百倍追鈔貫止問見使之人若知情行使者並依本律

錢法

凡錢法設立寶源等局鼓鑄洪武通寶銅錢與大中通寶及歷代銅錢相兼行使折二當三當五當十依數准算民間金銀米麥布帛諸物價錢並依時直聽從民便若阻滯不即行使者杖六十其軍民之家除鏡子軍器及寺觀庵院鐘磬鐃鈸外其餘應有廢銅並聽赴官中賣每斤給價銅錢一百五十文若私相買賣及收匿在家不赴官中賣者各笞四十

收糧違限

凡收夏稅於五月十五日開倉七月終齊足秋糧十月初一日開倉十二月終齊足如早收去處預先收受者不拘此律若夏稅違限至八月終秋糧違限至次年正月終不足者其提調部糧官吏典分催里長欠糧人戶各以十分為率一分不足者杖六十每一分加一等罪止杖一百受財者計贓以枉法從重論若違限一年之上不足者人戶里長杖一百遷徙提調部糧官吏典處絞

多收稅糧斛面

凡各倉收受稅糧聽令納戶親自行概平斛交收作數  
支銷依令准除折耗若倉官斗級不令納戶行概跌斛  
淋尖多收斛面者杖六十若以附餘糧數計贓重者坐  
贓論罪止杖一百提調官吏知而不舉與同罪不知者  
不坐

隱匿費用稅糧課物

凡送本戶應納稅糧課物及應入官之物而隱匿費用  
不納或詐作損失欺妄官司者並計所虧欠物數准竊



盜論免刺其部運官吏知情與同罪不知者不坐

攬納稅糧

凡攬納稅糧者杖六十著落赴倉納足再於犯人名下追罰一半入官 若監臨主守攬納者加罪二等 其

小戶畸零米麥因便輾數於納糧人戶處附納者勿論

虛出通關硃鈔

凡倉庫收受一應係官錢糧等物不足而監臨主守通同有司提調官吏虛出通關者計所虛出之數併贓皆

以監守自盜論 若委官盤點錢糧數本不足符同申報足備者罪亦如之受財者計贓以枉法從重論 其監守不收本色折收財物虛出硃鈔者亦以監守自盜論納戶知情減二等免剌原與之贓入官不知者不坐其贓還主 同僚知而不舉者與犯人同罪不知及不同署文案者不坐

附餘錢糧私下補數

凡各衙門及倉庫但有附餘錢糧須要盡實報官明白

正收作數若監臨主守將增出錢糧私下銷補別項事  
故虧折之數瞞官作弊者並計贓以監守自盜論 若  
內府承運庫收受金帛當日交割未完者許令附簿寄  
庫若有餘剩之物本庫明白立案正收開申戶部作數  
若朦朧擅將金帛等物出外者斬守門官失於盤獲搜  
檢者杖一百

私借錢糧

凡監臨主守將係官錢糧等物私自借用或轉借與人

者雖有文字並計贓以監守自盜論其非監守之人借者以常人盜倉庫錢糧論若將自己物件抵換官物者罪亦如之

私借官物

凡監臨主守將係官什物衣服氈褥器玩之類私自借用或轉借與人及借之者各笞五十過十日各坐贓論減二等若有損失者依毀失官物律坐罪追陪

那移出納

凡各衙門收支錢糧等物已有文案勘合若監臨主守  
不正收正支那移出納還充官用者並計贓准監守自  
盜論罪止杖一百流三千里免刺 若不給半印勘合  
擅出權帖或給勘合不立文案放支及倉庫不候勘合  
或已奉勘合不附簿放支者罪亦如之 其出征鎮守  
軍馬經過去處行糧草料明立文案即時應付具數開  
申合干上司准除不在擅支之限違者杖六十

庫秤雇役侵欺

凡倉庫務場局院庫秤斗級若雇役之人侵欺借貸移  
易係官錢糧並以監守自盜論若雇主同情分受贓物  
者罪亦如之其知情不曾分贓而符同申報瞞官及不  
首告者減一等罪止杖一百不知情者不坐

冒支官糧

凡管軍官吏總旗小旗冒支軍糧入已者計贓准竊盜  
論免刺

錢糧互相覺察

凡倉庫務場官吏攢攔庫子斗級皆得互相覺察若知侵欺盜用借貸係官錢糧已出倉庫匿而不舉及故縱者並與犯人同罪失覺察者減三等罪止杖一百 若官吏虛立文案那移出納及虛出通關其斗級庫子攔頭不知者不坐

倉庫不覺被盜

凡有人從倉庫中出守把之人不搜檢者笞二十因不搜檢以致盜物出倉庫而不覺者減盜罪二等若夜直

更之人不覺盜者減三等倉庫直宿官攢斗級庫子不覺盜者減五等並罪止杖一百故縱者各與盜同罪若被強盜者勿論

守支錢糧及擅開官封

凡倉庫官攢斗級庫子役滿得代所收錢糧官物并令守支盡絕若無短少方許給由其有應合相沿交割之物聽提調官吏監臨盤點見數不得指厭指庫交割違者各杖一百若官物有印封記其主典不請原封官



司而擅開者杖六十

出納官物有違

凡倉庫出納官物當出陳物而出新物應受上物而受下物之類及有司和雇和買不即給價若給價有增減不實者計所虧欠及多餘之價坐贓論 若應給俸祿未及期而預給者罪亦如之 其監臨官吏知而不舉與同罪不知者不坐

收支留難

凡收受支給官物其當該官吏無故留難刁蹬不即收  
支者一日笞五十每三日加一等罪止杖六十徒一年  
守門人留難者罪亦如之 若領物納物之人到有  
先後主司不依次序收支者笞四十

起解金銀足色

凡收受諸色課程變賣物貨起解金銀須要足色如成  
色不及分數提調官吏人匠各笞四十著落均陪還官  
損壞倉庫財物

凡倉庫及積聚財物主守之人安置不如法曬晾不以時致有損壞者計所損壞之物坐贓論著落均陪還官若卒遇雨水衝激失火延燒盜賊劫奪事出不測而有損失者委官保勘覆實顯跡明白免罪不陪其監臨主守若將侵欺借貸挪移之數乘其水火盜賊虛捏文案及扣換交單籍冊申報瞞官者並計贓以監守自盜論同僚知而不舉者與同罪不知者不坐

轉解官物

凡各處徵收錢帛買辦軍需成造軍器等物所在州縣  
交收差有職役人員陸續類解本府若本府不即交收  
差人轉解勒令人戶就解布政司者當該提調正官首  
領官吏典各杖八十若布政司不即交收勒令各府就  
解部者首領官令典罪亦如之 其起運官物長押官  
及解物人安置不如法致有損失者計所損失之物坐  
贓論著落均陪還官若船行卒遇風浪及失火延燒或  
盜賊劫奪事出不測而有損失者申告所在官司委官

保勘覆實顯跡明白免罪不陪若有侵欺者計賊以監守自盜論 若起運官物不運本色而輒齎財貨於所納去處收買納官者亦計賊以監守自盜論

擬斷贓罰不當

凡擬斷贓罰財物應入官而給主及應給主而入官者坐贓論罪止杖一百

守掌在官財物

凡官物當應給付與人已出倉庫而未給付若私物當

供官用已送在官而未入倉庫但有人守掌在官若有侵欺借貸者並計贓以監守自盜論

隱瞞入官家產

凡抄沒人口財產除謀反謀叛及姦黨係在十惡依律抄沒其餘有犯律不該載者妻子財產不在抄沒入官之限違者依故入人流罪論 若抄割入官家產而隱瞞人口不報者計口以隱漏丁口論若隱瞞田土者計田以欺隱田糧論若隱瞞財物房屋孳畜者坐贓論各

罪止杖一百所隱人口財產並入官罪坐供報之人  
若里長同情隱瞞及當該官吏知情者並與同罪計所  
隱贓重者坐贓論全科受財者計贓以枉法各從重  
論失覺舉者減三等罪止笞五十

課程

明律

鹽法

凡犯私鹽者杖一百徒三年若有軍器者加一等誣指

平人者加三等拒捕者斬鹽貨車船頭匹並入官引領  
牙人及窩藏寄頓者杖九十徒二年半挑擔馱載者杖  
八十徒二年非應捕人告獲者就將所獲私鹽給付告  
人充賞有能自首者免罪一體給賞 若事發止理見  
獲人鹽當該官司不許輾轉攀指違者以故入人罪論  
凡鹽場竈丁人等除正額鹽外夾帶餘鹽出場及私煎  
貨賣者同私鹽法百夫長知情故縱及通同貨賣者與  
犯人同罪



凡婦人有犯私鹽若夫在家或子知情罪坐夫男其雖有夫而遠出或有子幼弱罪坐本婦

凡買食私鹽者杖一百因而貨賣者杖一百徒三年

凡守禦官司及鹽運司巡檢司巡獲私鹽即發有司歸勘各衙門不許擅問若有司官吏通同脫放者與犯人同罪受財者計贓以枉法從重論

凡守禦官司及有司巡檢司設法差人於概管地面并附場繫關去處常川巡禁私鹽若有透漏者關津把截

官及所委巡鹽人員初犯笞四十再犯笞五十三犯杖六十並附過還職如知情故縱及容令軍兵隨同販賣者與犯人同罪受財者計贓以枉法從重論

其巡獲私鹽入已不解官者杖一百徒三年若裝誣平人者加三等

凡軍人有犯私鹽本管千百戶有失鈴束者百戶初犯笞五十再犯杖六十三犯杖七十減半給俸千戶初犯笞四十再犯笞五十三犯杖六十減半給俸並附過還

職若知情容縱及通同販賣者與犯人同罪

凡起運官鹽每引二百斤為一袋帶耗五斤經過批驗所依數掣摺秤盤但有夾帶餘鹽者同私鹽法 若客鹽越過批驗所不經掣摺關防者杖九十押回盤驗

凡客商販賣官鹽不許鹽引相離違者同私鹽法 其

賣鹽了畢十日之內不繳退引者笞四十 若將舊引

影射鹽貨者同私鹽法凡起運官鹽并竈戶運鹽上倉

將帶軍器及不用官船起運者同私鹽法

凡客商將官鹽揷和沙土貨賣者杖八十

凡將有引官鹽不於拘該行鹽地面發賣轉於別境犯  
界貨賣者杖一百知而買食者杖六十不知者不坐其  
鹽入官

監臨勢要中鹽

凡監臨官吏詭名及權勢之人中納錢糧請買鹽引勘  
合侵奪民利者杖一百徒三年鹽貨入官

沮壞鹽法

凡客商中買鹽引勘合不親赴場支鹽中途增價轉賣沮壞鹽法者買主賣主各杖八十牙保減一等鹽貨價錢並入官其鋪戶轉買拆賣者不用此律

私茶

凡犯私茶者同私鹽法論罪如將已批驗截角退引入山影射照茶者以私茶論

私礬

凡私煎礬貨賣者同私鹽法論罪

匿稅

凡客商匿稅及賣酒醋之家不納課程者笞五十物貨酒醋一半入官於入官物內以十分為率三分付告人充賞務官攢攔自獲者不賞入門不弔引同匿稅法其造酒醋自用者不在此限若買頭匹不稅契者罪亦如之仍於買主名下追徵價錢一半入官

舶商匿貨

凡泛海客商船舶到岸即將物貨盡實報官抽分若停

塌沿港土商牙儈之家不報者杖一百雖供報而不盡者罪亦如之物貨並入官停藏之人同罪告獲者官給賞銀二十兩

人戶虧兌課程

凡民間週歲額辦茶鹽商稅諸色課程年終不納齊足者計不足之數以十分為率一分笞四十每一分加一等罪止杖八十追課納官 若茶鹽運司鹽場茶局及稅務河泊所等官不行用心辦課年終比附上年課額

虧兌者亦以十分論一分答五十每一分加一等罪止杖一百所虧課程著落追補還官若有隱瞞侵欺借用者並計贓以監守自盜論

錢債

明律

違禁取利

凡私放錢債及典當財物每月取利並不得過三分年月雖多不過一本一利違者答四十以餘利計贓重者



坐贓論罪止杖一百 若監臨官吏於所部內舉放錢  
債典當財物者杖八十違禁取利以餘利計贓重者依  
不枉法論 並追餘利給主 其負欠私債違約不還  
者五貫以上違三月笞一十每一月加一等罪止笞四  
十五十貫以上違三月笞二十每一月加一等罪止笞  
五十二百五十貫以上違三月笞三十每一月加一等  
罪止杖六十並追本利給主 若豪勢之人不告官司  
以私債強奪去人孳畜產業者杖八十若估價過本利

者計多餘之物坐贓論依數追還 若准折人妻妾子女者杖一百強奪者加二等因而姦占婦女者絞人口給親私債免追

費用受寄財產

凡受寄人財物畜產而輒費用者坐贓論減一等詐言死失者准竊盜論減一等並追物還主其被水火盜賊費失及畜產病死有顯跡者勿論

得遺失物

凡得遺失之物限五日內送官官物還官私物召人識  
認於內一半給與得物人充賞一半給還失物人如三  
十日內無人識認者全給限外不送官者官物坐贓論  
私物減二等其物一半入官一半給主 若於官私地  
內掘得埋藏之物者並聽收用若有古器鐘鼎符印異  
常之物限三十日內送官違者杖八十其物入官

市廛

明律

私充牙行埠頭

凡城市鄉村諸色牙行及船埠頭並選有抵業人戶充應官給印信文簿附寫客商舡戶住貫姓名路引字號物貨數目每月赴官查照私充者杖六十所得牙錢入官官牙埠頭容隱者笞五十革去

市司評物價

凡諸物行人評估物價或貴或賤令價不平者計所增減之價坐贓論入已者准竊盜論免刺其為罪人估

贓不實致罪有輕重者以故出入人罪論受財者計贓以枉法從重論

把持行市

凡買賣諸物兩不和同而把持行市專取其利及販鬻之徒通同牙行共為姦計賣物以賤為貴買物以貴為賤者杖八十 若見人有所買賣在傍高下比價以相惑亂而取利者笞四十 若已得利物計贓重者准竊盜論免刺

私造斛斗秤尺

凡私造斛斗秤尺不平在市行使及將官降斛斗秤尺作弊增減者杖六十工匠同罪 若官降不如法者杖七十提調官失於校勘者減一等知情與同罪 其在市行使斛斗秤尺雖平而不經官司校勘印烙者笞四十 若倉庫官吏私自增減官降斛斗秤尺收支官物而不平者杖一百以所增減物計贓重者坐贓論因而得物入已者以監守自盜論工匠杖八十監臨官知而

不舉者與犯人同罪失覺察者減三等罪止杖一百

器用布絹不如法

凡造器用之物不牢固真實及絹布之屬紕薄短狹而賣者各笞五十其物入官

明會典卷一百三十五

欽定四庫全書

明會典卷一百三十六

刑部十一

類進贓罰

囚人贓罰本部類進內府收貯備用前後事例不一今具載之而以贓物估計附於後

諸司職掌

凡各布政司并直隸府州應有追到贓物彼處官司用



印鈐封批差長解人管解到部照依地方發下該部承  
行仍照來文內開到金銀鈔貫段疋紬絹等項數目案  
呈本部具手本差官齎赴內府關領進物勘合回部照  
數填寫明白又具長單一様二紙編寫字號用使半印  
勘合堂上官押字用印對查無差將前項贓物原封不  
動就差原解人同將勘合長單進赴內府該庫各門守  
衛官并門吏於各長單書名畫字用訖照進關防放進  
到庫庫官眼同原解人拆開原封照依原進數目檢開

無欠交收入庫將勘合并長單一紙本庫收留存照外  
有長單一紙本庫官吏出給實收押字用印交付原解  
人收齎仍於各門打訖照出關防回部附卷仍將長解  
原批上批寫解到金銀鈔貫等項贓物已於某年月日  
進赴內府某庫納訖某部批回原解人將批文齎回該  
衙門備照其本部問擬犯人除恐嚇詐欺強買賣有餘  
利科歛求索係取與不和用強生事逼抑取受之贓並  
還物主外餘有接受枉法不枉法彼此俱罪之贓并應

合抄劄犯人家財俱各見數責付庫子收領下庫聽候  
類解取訖領狀附卷每年春夏秋冬四季庫子將收過  
各部一應贓物備細開寫自某年某月某日為始至某  
年某月終收到某部某部追抄犯人某人等名下金銀  
鈔貫段疋等項若干開呈湖廣部照數案呈本部關給  
勘合出具長單如前進納湖廣部照依批迴移付各部  
知會各部又於原卷查照相同然後附卷備照

明令

凡以贓致罪者彼此俱罪之贓沒官用強生事逼取之贓給主

事例

洪武二十八年令各部將原收各布政司直隸府州解到贓銀等項自行送進內府該庫交收 永樂二年令各司按季通付湖廣司類進 三年令各處官司解到并追收銀兩俱各行取銀匠辨驗成色會官煎銷潔淨其鈔貫段疋衣服等項亦各行取鋪戶檢驗堪中進納

二十一年令各處官司通查在庫贓銀類解本部轉  
送內承運庫交收 宣德四年改送隨駕司禮監十年  
仍送承運庫 景泰元年令南京刑部都察院等衙門  
問擬納米囚人折納銀兩并追陪贓罰銀鈔等件俱送  
應天府官庫收貯委官估計追買物料成造軍器 五  
年令南京各衙門每季各委官一員會同戶部委官點  
收贓罰除金銀煎銷類解及器皿不堪收貯者變賣外  
其銅錫鐵蠟紵絲綾羅絹布皮張等項及追到解戶多

料物料送赴南京內庫收貯 六年以後令南京刑部  
將贓罰鈔貫送南京內庫交收其金銀仍追解京轉送  
內府收貯 成化二年令南京兩法司及應天府贓罰  
銀兩貨物暫免解京俱送南京戶部收買米麥以備賑  
濟 十三年令法司贓罰金銀俱要會官煎成足色送  
庫交收其承行該吏敢有增減成色抵換侵欺者查究  
治罪 弘治六年令南京兩法司贓罰金銀珠翠寶石  
暫送南京內庫收貯候蓄積數多仍照舊解京其見在

未曾糴買米麥金銀等項并以後贓罰衣服銅錢絹布等物仍送應天府收貯糴米自後每遇年終各司贓罰金銀鈔貫等項俱付送湖廣司將金銀煎銷成錠并鈔貫等項如前類進南京內庫交收 九年奏准在京在外一應該追贓物止直八九兩以下及埋葬銀監追一年之上勘無家產變賣者先照本犯原擬發落出外仍令召保營辦完納不必久禁其犯該充軍立功及贓多情重仍於本犯子孫家屬名下追徵者不在此例 十

年奏准本部贓罰銀兩支與吏戶禮兵工五部及大理寺買辦紙劄筆墨硃炭等項

計贓時估

明令

凡計贓者皆據犯處當時物價若計傭賃器物為贓者亦依犯時價值其傭賃雖多不得過其本物之價

事例

一金銀銅錫之類



金一兩四百貫

銀一兩八十貫

銅錢一千文八十貫

生熟銅一斤四貫

鐵一斤一貫

錫一斤四貫

黑鉛一斤三貫

一珠玉之類

玉一片長二寸闊一寸厚五分八十貫

珍珠一顆重一分一十六貫

寶石一粒重一分八貫

翠一箇一十貫

一羅段布絹絲綿之類

紗一疋八十貫

綾一疋一百二十貫

紵絲一疋二百五十貫

羅一疋一百六十貫

改機一疋一百六十貫

錦一尺八貫

高麗布一疋三十貫

大青三梭布一疋五十五貫

大白三梭布一疋四十貫

中細白綿布一疋二十貫

麁綿布一疋一十貫

麤苧布一疋一十二貫

細苧布一疋二十四貫

麤褐一疋四十貫

綿紬一疋五十貫

大綿布一疋二十貫

麻布一疋八貫

葛布一疋二十貫

大絹一疋五十貫

小絹一疋二十貫

細絨褐一疋二百四十貫

氈段一段五十貫

氈氈一段五十貫

絲綿一斤二十四貫

淨綿花一斤三貫

麻一斤五百文

一米麥之類

粳糯米每一石二十五貫

小麥一石二十貫

大麥一石一十貫

芝蔴一石二十五貫

蜀秫一石一十二貫

黃黑菽豌豆每一石一十八貫

粟米黃米每一石一十八貫

麴一斤五百文

一畜產之類

馬一匹八百貫

騾一頭五百貫

驢一頭二百五十貫

駝一頭一千貫

水牛一隻三百貫

黃牛一隻二百五十貫

大猪一口八十貫

羊一隻四十貫

鹿一隻八十貫

小猪一口一十二貫

犬一隻一十貫

獐一隻二十貫

猫一箇三貫

兔一隻四貫

虎豹皮每張四十貫



馬皮一張一十六貫

牛皮一張二十四貫

鹿皮一張二十貫

馬騾牛驢猪羊獐鹿肉一斤一貫

鵝一隻八貫

鴨一隻四貫

雞野雞每一隻三貫

鴿鷓鴣每一隻五百文

天鵝一隻二十貫

魚鱉鰕螯每斤一貫

一蔬菓之類

核桃榛子每斤一貫

棗栗柿餅每斤一貫

菱芡一斤一貫

松子一斤一貫

葡萄一斤一貫

楊梅一斤一貫

西瓜一十箇四貫

桃梨每一百箇二貫

杏李林禽每一百箇一貫

柑橙橘石榴每一百箇一貫

柿子每一百箇一貫

菜一百斤二貫

薑一十斤一貫

藕一十枝二貫

蓮房二十箇一貫

冬瓜一箇五百文

蒜頭一百箇五百文

一巾帽衣服之類

紗帽一頂二十貫

胡帽一頂八貫

貂鼠披肩一頂四十貫

棕草帽一頂八貫

儒吏等巾每一頂八貫

紵絲羅帽每一頂六貫

氈帽一頂四貫

絛一條一貫

氈襪一雙四貫

氈衫一領四十貫

鹿皮靴一雙二十四貫

麂皮靴一雙四十貫

牛皮靴一雙一十貫

鞞鞋一雙二貫

鞞鞋一雙一貫五百文

紵絲羅荷包每一箇一貫

包頭一方一貫

手帕一方二貫

網巾一項三貫

綿紵絲被每一床一百貫

綾被一床四十貫

紬絹被每一床二十貫

氈條一條四十貫

花毯一條八十貫

綿紵絲褥一床八十貫

布褥一床一十六貫

細布綿花被一床三十貫

麗布綿花被一床二十貫

舊綿布衣服一件五貫

新紵絲衣服一件八十貫

舊羅衣服一件二十四貫

新綿布衣服一件一十六貫

舊紵絲衣服一件三十貫

新羅衣服一件七十貫

新紗衣服一件六十貫



舊紵絲小襖一件二十貫

新紵絲小襖一件四十貫

舊羅紗小衫每一件一十貫

新羅紗小衫每一件三十貫

舊紵絲裙一條二十五貫

新紵絲裙一條五十貫

舊羅紗裙每一條二十貫

新羅紗裙每一條四十貫

綾紬衣服每一件二十貫

綾紬小襖每一件一十貫

絨褐衣服一件八十貫

舊夏布衣服一件五貫

新夏布衣服一件一十貫

綿布小衫一件五貫

綿布裙一條五貫

綿布袴一腰四貫

一器用之類

門一扇五貫

板隔一扇一十貫

窓一扇三貫

木板一片闊一尺長五尺厚五寸四貫

桌一張一十貫

凳一條四貫

杌一面二貫

交椅一把二十四貫

琴一張六十貫

扇一把一文

木箱一箇八貫

大屏風一箇二十四貫

竹簾一箇二貫

棕蓑衣一件三十貫

笠一項一貫

雨傘一把二貫

雨籠一箇一貫

牆壁籬笆一丈一十貫

大磁餅一箇一貫

大磁缸一箇一十貫

漆盤一箇四貫

漆椀每箇一貫

烏木筋十雙四貫

竹筴十雙五百文

磁櫟椀每十箇二貫

大木桶一隻五貫

大木盆一箇三貫

斛一張五貫

斗一量二貫

升一箇五百文

大鐵鍋一口八貫

銅鍋一口二十貫

鐵鋤一把二貫

鐵犁一把二貫

鐵鋤一把二貫

大車一輛三百貫

小車一輛二十四貫

船一隻計料一百石五百貫

馬鞍一副六十貫

鼓一面五貫

碾磨每一副三十貫

女轎一頂八十貫

秤一把五百文

鐵索一條一貫

鎖頭一箇五百文

弓一張八貫

箭一十枝四貫



鎗一根四貫

大刀一把五貫

小刀一把二貫

弩一張八貫

魚叉一把一貫

禾叉一把一貫

大磬一口二十貫

鐃鈸一副四貫

柴草一小車一十五貫

木柴一百斤八貫

灰炭每十斤一貫

煤一石八貫

瓦一百片一十貫

磚一百箇一十六貫

木一根圍一尺長一丈六貫

椽一根四貫

猫竹一根二貫

蘆蓆一領一貫

筆竹一根五百文

秣稽穀草每一大車四十貫

白蠟一斤一十貫

黃蠟一斤二貫

香油一斤一貫

茶一斤一貫

酒醋每一瓶一貫

真粉一斤五百文

鹽每十斤二貫五百文

蜂蜜沙糖每一斤一貫

蘇木一斤三貫

胡椒一斤八貫

花椒一斤一貫

銀硃一斤一十貫

礬一斤五百文

硃砂一兩四貫

硫黃一斤一貫

榜紙一百張四十貫

中夾紙一百張一十貫

奏本紙一百張一十六貫

手本紙一百張七貫

各色大箋紙一百張二十貫

墨一斤八貫

筆一十枝二貫



明會典卷一百三十六

# 欽定四庫全書

史部

明會典卷一百

三十七至  
四十二

詳校官編修<sub>臣</sub>裴謙

編修<sub>臣</sub>程嘉謨覆勘

總校官知縣<sub>臣</sub>繆琪

校對官編修<sub>臣</sub>于鼎

謄錄監生<sub>臣</sub>羅應台



欽定四庫全書

明會典卷一百三十七

刑部十二

收買紙劄

本部紙劄舊例收買應用後令囚人納紙而各衙門紙劄亦從本部關給各有事例今具列于後

諸司職掌

凡本衙門合用奏啓本案驗行移簿籍囚人寫招服辯

一應紙劄山西部掌行每季會計合用奏啓本等紙各若干估計合用鈔若干本部明立文案開付湖廣部於贓罰鈔內照數關支差官前去街市及客商販賣去處照依時價兩平收買數足到部堂上官用印封鈐責付庫子收領在庫聽候各部將各季用紙數目呈堂判送湖廣部立案照數關支候至季終銷用盡絕各部開稱爲某事用過某色紙若干逐一開付本部將各部花銷紙數查理明白將來付附卷其餘季分如前施行

事例

洪武二十七年奏准問過罪囚除逃軍逃囚全家抄劄起發并刼賊外其餘官吏軍民人等俱各辦納紙劄一分每年春夏秋冬四季本衙門置立文簿一扇輪流管掌各部追到紙劄俱送該管部分附簿明白着令管庫吏典庫子收貯每月各部分合用紙劄赴該部關支應用餘剩之數季終該部呈繳本部出給長單送赴內府該庫交納取獲長單附卷天順二年令本部囚人官

民紙劄俱收貯在庫每季劄委主事一員輪流掌管放  
支及令照磨所置立印信文簿將日逐大理寺審允回  
報犯人姓名備寫以憑稽考其浙江等十三司亦各立  
文簿一扇公同收紙令吏將囚人紙劄每名追收附簿  
每日一次將有紙犯人開具手本二本一本送照磨所  
查名勾銷一本連紙送管庫主事收庫以備各衙門關  
支其管庫主事收放紙劄一季滿日將紙數呈堂批送  
山西司查照 成化二年奏准囚人有力者該折奏本

手本榜紙中夾紙張照依時價兩平折納收受入庫候  
各衙門關用每官紙一分榜紙四十張告紙一分勘合  
紙二十張中夾紙三十張軍民紙一分中夾紙五十張  
奏本紙十張手本紙五張內中夾紙每張折納手本紙  
二張每五張折納榜紙一張每二張半折納奏本紙一  
張 十三年奏准各司囚人紙劄各立文卷一宗就令  
收紙令吏呈行收過并送過數目明立文案每五日一  
次具印信手本仍送管庫主事處交收守取印信實收

附卷備收其管庫主事置立收放紙數文卷一宗收過  
某司紙劄若干放過某衙門紙劄若干明白立案附卷  
候管庫委官滿日連卷呈堂發下照磨所照刷批送山  
西司收照其各司紙劄文卷亦每月一次送所照刷如  
有隱漏不報增減紙數者呈堂究問 凡問過囚人發  
審有名者各納紙一分文武職官正妻監生生員吏典  
總小旗知印承差僧道僧道官醫生天文生應襲舍人  
里老俱官紙軍校竈匠廚役勇士力士及各餘丁陰陽

人民人婦女俱民紙原告及訴人該納官紙者仍納官  
紙該納民紙者俱納民紙供明亦照例納紙 凡強竊  
盜死罪逃軍民匠囚犯充軍遇革釋放者並免納紙  
凡囚犯紙劄照依時估聽其自行買納若無籍之徒及  
管押吏典人等通同作弊分外增騙錢物者問罪枷號  
一箇月發落若監追紙劄三箇月之上不能完納者放  
免 弘治十年奏准吏戶禮兵工五部及大理寺歲用  
紙劄刑部關支不敷於都察院見收類解紙劄內關用

如又不敷并刑部題奏本紙俱於兩法司支贓罰銀買辦有餘作次年之用

處決重囚

諸司職掌

凡大理寺秋後覆奏處決重囚如本寺牒至即差皂隸照名於司獄司將犯人押赴法場仍令主事廳具手本會請監察御史等官公同處決批回附卷

事例



洪武元年令處決重刑須從秋後無得非時以傷生意  
三年令臣民有罪法當死者三覆五奏毋輒行刑

宣德十年令死罪臨決須三次覆奏明白然後加刑

正統元年令重囚三覆奏畢仍給駕帖付錦衣衛監刑  
官領校尉詣法司取死囚赴市 凡秋後處決重囚內

有訴冤枉者直鼓給事中接受本狀封進仍批手令校  
尉前去市曹暫免行刑聽候請旨 弘治十三年申明  
凡律該決不待時重犯鞫問明白曾經大理寺詳允奏

奉欽依處決者各該部院并該科即便覆奏會官處決  
不必監至秋後 凡殺一家非死罪三人及支解人為  
首在監死者除將財產斷付被殺者之家妻子流二千  
里仍剉碎死屍梟首示衆 凡強盜殺傷人放火燒人  
房屋姦污人妻女劫牢獄倉庫干係城池衙門并積至  
百人以上不分曾否傷人俱即奏請審決梟首示衆

每歲秋後差官分往兩直隸處決重囚北直隸一員南

直隸江南一員江北一員

每月禁刑日期

初一日

初八日

十四日

十五日

十八日

二十三日

二十四日

二十八日

二十九日

三十日

詳擬罪名

諸司職掌

凡各布政司并直隸府州遇有問擬刑名笞杖就彼決斷徒流遷徙充軍雜犯死罪解部審錄發落其合的決絞斬凌遲處死罪名各處開坐備細招罪事由照行事理呈部詳議比律允當者則開緣由具本發大理寺覆擬如覆擬平允行移各該衙門如法監收聽候依時差官審決如有決不待時重囚詳擬允當隨即具奏差官前去審決其有情詞不明或出入罪失出入者駁回改正再問若故出入情弊顯然具奏連原問官吏提問

審錄罪囚

明祖訓

凡聽獄訟要明不明則刑罰不中罪加良善久則天必怒焉或有大獄必當面訊庶免構陷鍛鍊之弊

事例

洪武三十年令五府六部都察院六科通政司詹事府詳審罪囚三十一年令軍民人等犯徒流以下俱不申詳止將死罪并應議文武官員不分罪名輕重俱監

卷一百三十五  
候具由申呈合干上司轉達待報發落 三十二年令  
徒流雜犯死罪充軍囚犯仍復申詳但止將原發招由  
轉呈候審允訖行令照依原擬發落 永樂十七年令  
在外死罪重囚悉送京師會官審錄 洪熙元年令公  
侯伯五府六部堂上官內閣學士及給事中會審重囚  
可疑者仍令再問 天順二年令每歲霜降後該決重  
囚三法司會多官審錄永為定例 成化元年奏准內  
閣不必會同審囚 十四年奏准凡真犯死罪重囚推

情取具招辯依律擬罪明白具本連證佐干連人卷俱  
發大理寺審錄如有招情未明擬罪不當稱冤不肯服  
辯者俱駁回再問若招情明白擬罪合律輸情服辯者  
本寺將審允緣由奏奉欽依准擬依律處決方纔回報  
原問衙門監候照例具奏將犯人引赴承天門外會同  
多官審錄其審錄之時原問原審并接管官員仍帶原  
卷聽審情真無詞者覆奏處決如遇囚番異稱冤有詞  
各官仍親一一照卷陳其始末來歷并原先問審過緣

由聽從多官從公叅詳果有可矜可疑或應合再與勘  
問通行備由奏請定奪 弘治七年命三法司錦衣衛  
堂上官凡捕獲強盜綁赴御前引奏者仍在午門前會  
問明白追贓擬罪如律備由具奏奉有欽依刑科覆奏  
隨即處決中間果有情可矜疑者明白上請定奪或有  
冤枉亦與辯明

差官審錄

明令



凡所在重刑須要追勘一切完備在京申御史臺在外  
從監察御史提刑按察司審錄無冤有司結案待報若  
犯人番異或家屬稱冤聽牒移推

事例

洪武十四年差監察御史分按各道罪囚凡罪重者悉  
送京師二十四年差刑部官及監察御史清理天下  
獄訟二十五年令刑部詳審在外呈詳獄囚務得真  
情然後差官審決惟雲南路遠令本處會官詳審處決

永樂元年各布政司所屬死罪重囚至百人以上者  
差御史審決 正統三年令各處巡撫侍郎審錄罪囚  
無巡撫者巡按清軍御史審錄 四年令都布按三司  
每歲委官會巡按御史審錄罪囚 六年令監察御史  
及刑部大理寺官分往各處會同先差審囚官及巡按  
御史按察司官詳審疑獄 十二年差刑部大理寺官  
往南北直隸及十三布政司會同巡按御史三司官審  
錄死罪可矜可疑及事無證佐可結正者具奏處置徒

流以下減等發落若御史別有公務督同所在有司審錄原問官故入等罪俱不追究 弘治二年令法司每年立秋時將在外監候聽決重囚不分有無訴訟備查各囚籍貫姓名及在外見監問有無招擬一應死罪囚犯通行具奏轉行各該巡按御史會同都布按三司并分巡分守南北直隸行移差去審刑主事會同巡按御史督同都司府衛從公研審除情真罪當者照例處決果有冤抑者即與辯理情可矜疑者徑自具奏定奪其

未轉詳者責令轉詳未問結者督同問結俱要遍歷衙門逐一研審著為定例

夏月錄囚

事例

永樂二年四月諭三法司官天氣向熱獄囚淹久令五府六部六科給事中協同疏決死罪獄成者秋後處決輕罪隨即決遣有未能決者令出獄聽候 四年五月諭三法司天氣已熱除犯斬絞罪外徒流以下皆令知

在聽候發落 宣德二年五月六月七月節諭三法司  
天氣炎熱見監罪囚作急問斷該運土運磚者照例發  
落干礙奏請者一月一次類奏 三年諭法司及北京  
刑部今天氣暄熱獄中一應罪囚禁錮日久即將輕重  
罪犯具奏發落不許時刻遲滯 正統十四年春夏旱  
災命內臣一員公同三法司堂上官會審見監聽決罪  
囚情重者具實類奏處置 天順四年令法司將見監  
罪囚累訴冤枉者會同三法司堂上官刑科給事中各

一員審錄 成化四年令司禮監太監會同三法司堂  
上官審錄罪囚 二十一年命兩京法司錦衣衛天氣  
炎熱會審見監罪囚徒流以下減等發落重囚有可矜  
疑及枷號者具奏定奪 二十二年諭法司見今雨澤  
少降天氣向熱內外衙門見監罪囚恐有冤抑兩京令  
司禮監太監守備太監同三法司堂上官會審兩直隸  
差刑部郎中各一員會同巡按御史各處在城令巡撫  
巡按同三司掌印官各府州衛所令巡按御史同分巡

分守官逐一審錄死罪情可矜疑者具奏處置徒流以下減等發落不許遲慢 弘治元年夏令兩法司錦衣衛將見監罪囚情可矜疑者俱開寫來看自後歲以為常

歲報罪囚

諸司職掌

凡本部問發罪囚每遇年終各該部分開稱自洪武某年正月初一日為始至十二月終本部通問發過囚人

若干內凌遲若干斬若干絞若干斬罪免死終身工役  
若干絞罪免死終身工役若干流罪若干徒罪若干充  
軍若干隨營若干杖罪若干笞罪若干疎放寧家若干  
俱付山東部通類如前案呈本部開坐奏聞

事例

凡法司問過輕重罪囚每年十二月開報刑科具本類  
奏

明會典卷一百三十七



欽定四庫全書

明會典卷一百三十八

刑部十三

司門科

諸司職掌

律令

宮衛

關津

郵驛

軍政

廢牧

營造

河防

宮衛

明律

太廟門擅入

凡擅入太廟門及山陵兆域門者杖一百太社門杖九十未過門限者各減一等守衛官故縱者各與犯人同罪失覺察者減三等

宮殿門擅入

凡擅入皇城午門東華西華玄武門及禁苑者各杖一百擅入宮殿門杖六十徒一年擅入御膳所及御在所者絞未過門限者各減一等若無門籍冒名而入者罪亦如之其應入宮殿未著門籍而入或當下直而輒入及宿次未到而輒宿者各笞四十若不係宿衛應直合帶兵仗之人但持寸刃入宮殿門內者絞入皇城門內者杖一百發邊遠充軍門官及宿衛官軍故縱者各與犯人同罪失覺察者減三等罪止杖一百軍

人又減一等並罪坐直日者

宿衛守衛人私自代替

凡宮禁宿衛及皇城門守衛人應直不直者笞四十以應宿衛守衛人私自代替及替之人各杖六十以別衛不係宿衛守衛人冒名私自代替及替之人各杖一百百戶以上各加一等 若在直而逃者罪亦如之 京城門減一等各處城門又減一等親管頭目知而故縱者各與犯人同罪失覺察者減三等有故而赴所管告

知者不坐

從駕稽違

凡應從車駕之人違期不到及從而先回還者一日笞四十每三日加一等罪止杖一百百戶以上各加一等若從車駕行而逃者杖一百發邊遠充軍百戶以上絞親管頭目故縱者各與犯人同罪失覺察者減三等罪止杖一百

直行御道

凡午門外御道至御橋除侍衛官軍導從車駕出入許於東西兩傍行走外其餘文武百官軍民人等無故於上直行及輒度御橋者杖八十若於宮殿中直行御道者杖一百守衛官故縱者各與犯人同罪失覺察者減三等若於御道上橫過係一時經行者不在禁限

內府工作人匠替役

凡諸色工匠行人差撥赴內府及承運庫工作若不親身關牌入內應役雇人冒名私自代替及替之人各杖

一百雇工錢入官

宮殿造作罷不出

凡在宮殿內造作所司具工匠姓名報門官及守衛官就於所入門首逐一點視放入工作至申時分仍須相視形貌照數點出其不出者絞監工及提調內使監官門官守衛官軍點視如名數短少就便搜捉隨即奏聞知而不舉者與犯人同罪失覺察者減三等罪止杖一百

輒出入宮殿門

凡應出宮殿而門籍已除輒留不出及被告劾已有公文禁止籍雖未除輒入宮殿者各杖一百 若宿衛人已被奏劾者本司先收其兵仗違者罪亦如之 若於宮殿門雖有籍至夜皆不得出入若入者杖一百出者杖八十無籍入者加二等若持仗入殿門者絞

關防內使出入

凡內使監官并奉御內使但遇出外各門官須要收留



本人在身關防牌面於簿上印記姓名字號明白附寫前去某處幹辦是何事務其門官與守衛官軍搜檢沿身別無夾帶方許放出回還一體搜檢給牌入內以憑逐月稽考出外次數但搜出應干雜藥就令自喫若不  
服搜檢者杖一百充軍若非奉旨私將兵器進入皇城  
門內者杖一百發邊遠充軍入宮殿門者絞門官及守  
衛官失於搜檢者與犯人同罪

### 向宮殿射箭

凡向太廟及宮殿射箭放彈投磚石者絞向太社杖一百流三千里但傷人者斬

宿衛人兵仗

凡宿衛人兵仗不離身違者笞四十輒離職掌處所笞五十別處宿杖六十百戶以上各加一等親管頭目知而不舉者與犯人同罪失覺察者減三等

禁經斷人充宿衛

凡在京城犯罪被極刑之家同居人口隨即遷發別郡

住坐其親屬人等并一應經斷之人並不得入充近侍  
及宿衛守把皇城京城門禁若朦朧充當者斬其當該  
官司不為用心詳審或聽人囑託及受財容令充當者  
罪同 若有特旨選充曾經覆奏明立文案者不在此  
限

衝突儀仗

凡車駕行處除近侍及宿衛護駕官軍外其餘軍民並  
須迴避衝入儀仗內者絞若在郊野之外一時不能迴

避者聽俯伏以待其文武百官非奉宣喚無故輒入儀仗內者杖一百典仗護衛官軍故縱者與犯人同罪不覺者減三等

凡有申訴冤抑者止許於仗外俯伏以聽若衝入儀仗內而所訴事不實者絞得實者免罪

凡軍民之家縱放牲畜若守衛不備因而衝突儀仗者杖八十衝入皇城門內者杖一百

行宮營門

凡行宮外營門次營門與皇城門同若有擅入者杖一百內營牙帳門與宮殿門同擅入者杖六十徒一年

越城

凡越皇城者絞京城者杖一百流三千里越各府州縣鎮城者杖一百官府公廨牆垣者杖八十越而未過者各減一等若有所規避者各從重論

門禁鎖鑰

凡各處城門應閉而誤不下鎖者杖八十非時擅開閉

者杖一百京城門各加一等其有公務急速非時開閉者不在此限 若皇城門應閉而誤不下鎖者杖一百發邊遠充軍非時擅開閉者絞其有旨開閉者勿論

懸帶關防牌面

凡朝參文武官及內官懸帶牙牌鐵牌廚子校尉入內各帶銅木牌面如有遺失官罰鈔二十貫廚子校尉罰鈔一十貫若有拾得隨即報官者將各人該罰鈔貫充賞有牌不帶無牌輒入者杖八十借者及借與者杖一

百事有規避者從重論隱藏者杖一百徒三年首告者  
於犯人名下追鈔五十貫充賞詐帶朝參及在外詐稱  
官員名號有所求為者絞偽造者斬首告者於犯人名  
下追鈔一百貫充賞

關津

明律

私越冒度關津

凡無文引私度關津者杖八十若關不由門津不由渡

而越度者杖九十若越度緣邊關塞者杖一百徒三年  
因而出外境者絞守把之人知而故縱者同罪失於盤  
詰者各減三等罪止杖一百軍兵又減一等並罪坐直  
日者 若有文引冒名度關津者杖八十家人相冒者  
罪坐家長守把之人知情與同罪不知者不坐 其將  
馬騾私渡冒度關津者杖六十越度杖七十

詐冒給路引

凡不應給路引之人而給引及軍詐為民民詐為軍若



冒名告給引及以所給引轉與他人者並杖八十若於經過官司停止去處倒給路引及官豪勢要之人囑託軍民衙門擅給批帖影射出入者各杖一百當該官吏聽從及知情給與者並同罪若不從及不知者不坐若巡檢司越分給引者罪亦如之 其不立文案空押路引私填與人者杖一百徒三年 受財者計贓以枉法及有所規避者各從重論 若軍民出百里之外不給引者軍以逃軍論民以私度關津論

關津留難

凡關津往來船隻守把之人不即盤驗放行無故阻當者一日笞二十每一日加一等罪止笞五十 若官豪勢要之人乘船經過關津不服盤驗者杖一百 若撐駕渡船梢水如遇風浪險惡不許擺渡違者笞四十若不顧風浪故行開船至中流停船勒要船錢者杖八十因而殺傷人者以故殺傷論

遞送逃軍妻女出城

凡在京守禦官軍遞送逃軍妻女出京城者絞民犯者杖一百若各處守禦城池及屯田官軍遞送逃軍妻女出城者杖一百發邊遠充軍民犯者杖八十受財者計贓以枉法從重論其逃軍買求者罪同守門之人知情故縱者與犯人同罪失於盤詰者減三等罪止杖一百軍人又減一等若遞送非逃軍妻女出城者杖八十有所規避者從重論

盤詰姦細

凡緣邊關塞及腹裏地面但有境內姦細走透消息於外人及境外姦細入境內探聽事情者盤獲到官須要鞠問接引起謀之人得實皆斬經過去處守把之人知而故縱及隱匿不首者並與犯人同罪失於盤詰者杖一百軍兵杖九十

私出外境及違禁下海

凡將馬牛軍需鐵貨銅錢段疋紬絹絲綿私出外境貨賣及下海者杖一百挑擔馱載之人減一等物貨船車

並入官於內以十分為率三分付告人充賞若將人口軍器出境及下海者絞因而走泄事情者斬其拘該官司及守把之人通同夾帶或知而故縱者與犯人同罪失覺察者減三等罪止杖一百軍兵又減一等

私役弓兵

凡私役弓兵者一人答四十每三人加一等罪止杖八十每名計一日追雇工錢六十文入官當該官司應付者同罪罪坐所由

郵驛

明律

遞送公文

凡鋪兵遞送公文晝夜須行三百里稽留三刻答二十  
每三刻加一等罪止答五十其公文到鋪不問角數多  
少須要隨即遞送不許等待後來文書違者鋪司答二  
十

凡鋪兵遞送公文若磨擦及破壞封皮不動原封者一

角笞二十每三角加一等罪止杖六十若損壞公文一  
角笞四十每二角加一等罪止杖八十若沈匿公文及  
拆動原封者一角杖六十每一角加一等罪止杖一百  
若事干軍情機密文書不拘角數即杖一百有所規避  
者各從重論其鋪司不告舉者與犯人同罪若已告舉  
而所在官司不即受理施行者各減犯人罪二等

凡各縣鋪長專一於緊管鋪分往來巡視提調官吏每  
月一次親臨各鋪刷勘若失於檢舉者通計公文稽留

及磨擦破壞封皮不動原封十件以上鋪長答四十提  
調吏典答三十官答二十若損壞及沉匿公文若拆動  
原封者與鋪兵同罪提調吏典減一等官又減一等府  
州提調官吏失於檢舉者各遞減一等

邀取實封公文

凡在外大小各衙門官但有入遞進呈實封公文至御  
前而上司官令人於中途急遞鋪邀截取回者不拘遠  
近從本鋪鋪司鋪兵赴所在官司告舉隨即申呈上司



轉達該部追究得實斬其鋪司鋪兵容隱不告舉者各杖一百若已告舉而所在官司不即受理施行者罪亦如之 若邀取實封至五軍都督府六部察院公文者各減二等

鋪舍損壞

凡急遞鋪舍損壞不為修理什物不完鋪兵數少不為補置及令老弱之人當役者鋪長答五十有司提調官吏各答四十

私役鋪兵

凡各衙門一應公差人員不許差使鋪兵挑送官物及私已行李違者答四十每名計一日追顧工錢六十文入官

驛使稽程

凡出使馳驛違限常事一日答二十每三日加一等罪止杖六十軍情重事加三等因而失誤軍機者斬若各驛官故將好馬藏匿推故不即應付以致違限者對問

明白罪坐驛官其遇水漲路道阻碍經行者不坐 若驛使承受官司文書誤不依題寫去處錯去他所而違限者減二等事干軍務者不減若由公文題寫錯者罪坐題寫之人驛使不坐

多乘驛馬

凡出使人員應乘驛船驛馬數外多乘一船一馬者杖八十每一船一馬加一等若應乘驢而乘馬及應乘中等下等馬而勒要上等馬者杖七十因而毆傷驛官者

各加一等若驛官容情應付者各減犯人罪一等其應  
乘上等馬而驛官却與中等下等馬者罪坐驛官本驛  
如無上等馬者勿論 若枉道馳驛及經驛不換船馬  
者杖六十因而走死驛馬者加一等追償馬足還官  
其事非緊急不曾枉道而走死驛馬者償而不坐 若  
軍情緊急及前驛無船馬倒換者不坐不償

多支廩給

凡出使人員多支廩給者計贓以不枉法論當該官吏

與者減一等強取者以枉法論官吏不坐

文書應給驛而不給

凡朝廷調遣軍馬及報警急軍務至邊將若邊將及各衙門飛報軍情詣朝廷文書故不遣使給驛者杖一百因而失誤軍機者斬若進賀表箋及賑救饑荒申報災異取索軍需之類重事故不遣使給驛者杖八十若常事不應給驛而故給驛者笞四十

公事應行稽程

凡公事有應起解官物因徒畜產差人管送而輒稽留及事有期限而違者一日笞二十每三日加一等罪止笞五十若起解軍需隨征供給而管送違限者各加二等罪止杖一百以致臨敵缺乏失誤軍機者斬若承差人誤不依題寫去處錯去他所以致違限者減二等事干軍務者不減若由公文題寫錯者罪坐題寫之人承差不坐

占宿驛舍上房

凡公差人員出外幹辦公事占宿驛舍正廳上房者笞五十

乘驛馬賫私物

凡出使人員應乘驛馬除隨身衣仗外賫帶私物者十斤杖六十每十斤加一等罪止杖一百驛驢減一等私物入官

私役民夫搥轎

凡各衙門官吏及出使人員役使人民搥轎者杖六十

有司應付者減一等若豪富之家役使佃客擡轎者罪亦如之每名計一日追給雇工錢六十文其民間婦女若老疾之人及出錢雇工者不在禁限

病故官家屬還鄉

凡軍民官在任以疾病故家屬無力不能還鄉者所在官司差人管領應付脚力隨程驗口官給行粮遞送還鄉違而不送者杖六十

承差轉雇寄人



凡承差起解官物囚徒畜產不親管送而雇人寄人代領送者杖六十因而損失官物畜產及失囚者依律各從重論受寄受雇人各減一等 其同差人自相替放者各笞四十取財者計贓以不枉法論若事有損失者亦依損失官物及失囚律追斷不在減等之限

乘官畜產車船附私物

凡因公差應乘官馬牛駝騾驢者除隨身衣仗外私馱物不得過十斤違者五斤笞一十每十斤加一等罪止

杖六十 其乘船車者私載物不得過三十斤違者十斤笞一十每二十斤加一等罪止杖七十家人隨從者皆不坐若受寄私載他人物者寄物之人同罪其物並入官當該官司知而容縱者與同罪不知者不坐若應合遞運家小者不在此限

私借驛馬

凡驛官將驛馬私自借用或轉借與人及借之者各杖八十驛驢減一等驗日追雇賃錢入官若計雇賃錢重

者各坐贓論加二等

明會典卷一百三十八